

նական նպատակը՝ Անդրկովկասի միացումը: Վրացիք էլ դէմ չէին որոշ միութեան, պայմանով, որ Վրաստանի վեհապետական իրաւունքները չտուժեն: Հայերի համար, քանի թիւրքահայկական հարցը մնում էր անորոշ, գոյավիճակի ամէն փոփոխութիւն համարւում էր վաղաժամ: Այս դէպքում էլ նրանք չմերժեցին իրենց համաձայնութիւնը, բայց այդ արեւց այնպէս, որ հաւասար էր մերժումի:

Դեռ կոնֆեդերացիայի խնդիրը չփակած, ապր. 16-ին ազրբէջանցիք բերին զինւորական գործակցութեան առաջարկը Խորհրդային Ռուսաստանի դէմ: Վրացիք չառարկելով հանդերձ՝ առաջ քաշեցին սահմանագծման հարցը: Հայերն էլ դէմ արտայայտեցին արտաքին ճակատով զբաղւելուն: «Այժմ, երբ անդրկովկասեան հանրապետութիւնների առջև կանգնած է մի նոր վտանգ և նոր արիւնհեղութիւններ են հնարաւոր, հայկական պատուիրակութիւնը մերժում է զբաղւել արտաքին քաղաքականութեամբ», վրդովւած նկատեց ազրբէջանցի Վեքիլովը:

«Այո՛, առարկեց հայերի կողմից Տ. Բէզդադեանը, քանի հոգային հարցերը չեն լուծւած, խորհրդաժողովի որոշումները ո՛չ մի արժէք չեն ունենայ: Եթէ ենթադրենք, որ խորհրդաժողովը որոշէ ընդհանուր ուժերով դուրս գալ արտաքին ոտնձգութիւնների դէմ ի պաշտպանութիւն մեր հանրապետութիւնների անկախութեան, այսինքն՝ հիւսիսի վտանգի դէմ, այն ժամանակ հայկական պատուիրակութիւնը կառաջարկէ քննել հարաւային վտանգի հարցը, որովհետև թիւրքերը, որքան յայտնի է, դաշնակից են բուլղերիկների հետ: Բացի այդ, խորհրդաժողովը պէտք է ստոյգ տեղեկութիւններ ունենայ այն համաձայնութեան մասին, որը, իբր թէ, գոյութիւն ունի Թիւրքիայի և Ազրբէջանի միջև: Մեզ համար անհրաժեշտ է պարզել նաև Ազրբէջանի կառավարութեան վերաբերումը դէպի մեր պետականութիւնը»:

Նորից հին հարցը՝ «հիւսիսի» ու «հարաւի» վտանգը: Ազրբէջանցու համար «հիւսիսն» էր սարսափելի. հայերը վախենում էին «հարաւից». էլ ի՞նչ խորհրդաժողով, ի՞նչ կոնֆեդերացիա, ի՞նչ համաձայնութիւն: Եւ ո՛չ մի համաձայնութիւն էլ չկայացաւ:

Իսկ մինչ պատգամաւորութիւնները խորհրդաժողովում ճառեր էին արտասանում, մինչ Ազրբէջանն իր ամբողջ բանակը կենտրոնացրել էր Ղարաբաղի դէմ, ապր. 28-ի գիշերը, բուլղերիկները, թիւրքերի անկցութեամբ և Ազրբէջանի Խորհրդարանի համաձայնութեամբ, առանց մի հատիկ փամփուշտ պարպելու, մտան Բաղու և Ազրբէջանում յայտարարեցին խորհրդային իշխանութիւն: Նոր գործօն էր մտնում Անդրկովկաս, որ դարիս էր բուրրովին այլ ընթացք տալու նորաստեղծ հանրապետութիւնների կեանքին: Եւ այդ նոր գործօնի ուշադրութեան առաջին առարկան եղաւ Հայաստանը: Յեղաշրջման յաջորդ օրը Բագուից Երևանի կառավարութեան ուղարկւեց հետեւեալ վերջնագիրը.